

REGIONAL NEWS BULLETIN

HEADLINES (MORNING)

1. **Disaster Management & Rehabilitation Minister Pu K. Sapdanga'n fur ruahtui tlak lai a nih avangin sawrkarin duh angin hna a thawk thei lo, a ti.**
2. **Aizawl Municipal Corporation (AMC) chuan Aizawl khawpui a faia a thianghlim nan Mizoram Municipalities Act 2007 leh AMC Solid Waste Management Bye-Laws 2019 hmangin hma a la mek.**
3. **Prime Minister Narendra Modi-a'n ram tana hmasawna hna an thawh nasat avangin sorkar hnathawkte a fak.**
4. **Akashvani chuan Ustad Amjad Ali Khan leh a chungte chawimawina a hlan.**

<><><>

DM&R MINISTER

Disaster Management & Rehabilitation Minister Pu K. Sapdanga chuan fur ruahtui tlak lai a nih avangin sawrkarin duh angin hna a thawk thei lova, veng bil leh pawl anga hmalaknaah sawrkar ngaichang turin mipui a ngen.

Sawrkar mi pawimawhte nena nimina Aizawl Hunthar Veng lei tlakhniamna hmun, NH-54 kawngpui tla hniam an enfiahnaah he thu hi a sawi a. Hunthar Local Council leh NGO ten Hunthar Middle School bul che vanga thahnemngaih vanga thuchhuah an siam chu an demawm loh thu a sawi a, chutih rualin sorkar hmalakna kal mek a nih avang leh fur ruah tui tlak lai a nih avangin duh angin hna a thawh theih loh avangin sorkar lo ngaichang turin a ngen a ni.

Hunthar lei tlakhniam thinna hmun NH-54 hi tunkar ruahsur nasa avang khan feet 5 velin a tla hniam a, kawngchhuat a khawh nasat bakah a nal hle a. PWD ten lirthei tangkhang a awmlah nan kawng tlakhniamna hmunah hian lung vawm khatin an hnawhkhat thin a. Lirthei veivak a tam avangin hnathawh a chak theih loh thu PWD hotute chuan an sawi.

Traffic Police te chuan Silchar lam atanga chakchai phur lirthei lo lut tur te chu kawng a that tawklah avangin kawng dung sir leh Rangvumual Truck Terminal-ah te dintir rih an ni, an ti a. Truck 100 chuang an tangkhang mek.

Hunthar lei tlak hniamna chhak Hunthar Presbyterian Biak in thlang kawngpui chhuat pawh a zahve velin a tla hniam a, lirthei veivakte chu a inchhawka tlantir thin an ni.

<><><>

AMC

Aizawl Municipal Corporation (AMC) chuan Aizawl khawpui a faia a thianghlim nan Mizoram Municipalities Act 2007 leh AMC Solid Waste Management Bye-Laws 2019 hmangin hma a la mek.

AMC tarlan danin kar kalta chhung khan Tui luankawra bawlhhlawh paih pawisa chawitir mi 12 an awm a, phal lohna hmuna leivung paih vanga pawisa chawitir mi 1, Septic tank enkawl tha lo leh soakpit tel lova septic tank hmang siam tha tura hriattir mi 24 an awm.

Heng bakah hian midang tana rimchhia leh hnawksaka Vawk vulh chhungkaw 1 chu hun tiam chhunga an vawk tiral tura hriattirna lehkha pek an nih bakah tuichhe luanna fel lo chhungkaw 4 te pawh an tuichhe luanna siam tha nghal tura hriattir an ni bawk.

AMC chuan Central Pollution Control Board thuchhuah leh Plastic Waste Management Rules 2016 te bawhzuiin AMC Plastic Waste Management Bye-Laws 2019 a siam a. Heng dan hnuaiah hian Phal loh Hman khat daih plastic te tirem turin hma a la mek bawk a. Chawlhkar liam ta chhung khan hman phal loh chi sarang hi Kg 72 man a ni. AMC chuan Faina leh thianghlimna leh Single Use Plastic hman khap te chungchangah hriselna atan leh leilung venhim nan kaihhruainate ngai pawimawh turin mi tin a ngen a ni.

<><><>

PWD CLEARS UP DEBRIS

Tun hnaia ruahsur nasa vangin Aizawl veng hrang hrangah lei a min nual bakah kawngpui diak avanga zawh harsa a awm teuh a. Nimin khan PWD Aizawl North Sub Division No – III leh Edenthar Veng mipui tangkawp chuan leimin nasatna lai Chanmari West kawipui atanga Lalsangliana Petrol Pump, Edenthar inkar kawng diak thenfai hna an thawk a. Leimin hi ni 22 khan thenfai hnatlang neih a lo ni tawh a, helai hmuna leimin leh kawngpui diak thenfai hna thawh zawh a ni.

Nimin vek khan Aizawl Road North Sub Division No-III huam chhung Zonuam Venga lung leh lei min nasa tak leh MHNL Road, Ebenezer to High Court Road-a leimin te paihfai hna thawh a ni bawk a.

PWD Aizawl Road North Sub Division-I chuan nimin khan Aizawl Civil Hospital pan chhohna bula side drain tihfai hna an thawk bawk a. Hospital Gate thlen hma velah bawlhhlawh bawm a awm that loh avangin khawlaiah bawlhhlawh paih thin a ni a; tunkar ruahtui nasa avang khan bawlhhlawh te hi tuilankawrah luang lutin a hnawh vek a, hemi avang hian kawngpui dungah tui rimchhia leh bal a luang chhuak thin a, ni 22 atang khan thenfai hna thawh tan niin nimin khan side drain tihfai hna hi zawh a ni.

PWD hotute sawi danin leimin thian fai tur hian a paihna tur hmanrua neih that a ngai a, man chawia paih a ngaih bakah paihna hmun a van avangin hnathawh chak a har a, theihtawpa chaka hnathawh mek zel a ni, an ti.

<><><>

CYMA SEIZED METH

Central YMA Kumpulan duty te chuan nimin zing khan Aizawl Tuikual South huam chhung, Temple Square-a Sumo Stand-ah ruihhlo

Methamphetamine mum Nuai 1 sang 1, KG 9 leh gram 907 an man a, a kaihhnawihah mi pahnih an man tel bawk.

CYMA Kumpulan Committee hian report an dawn bawhzuiin zan hnih tlaivara an chhui hnuah nimin zing khan Methamphetamine hi an man a, ruihhlo man te hi Cheng Nuai 45 Sing 4 Sang 5 man vel a ni.

Ruihhlo leh a kaihhnawiha man te hi Excise & Narcotics Department kutah hlan nghal an ni.

<><><>

ASF

Animal Husbandry & Veterinary Department chhinchhiah dan chuan kuminah tun thla ni 15 thleng khan ASF vanga vawk thi 9866 an awm a, vawk suat 17,977 an awm tawh bawk a. Kumina vawk thi neitute erawh sorkarin zangnadawmna a la pe lo.

Kum 2018 atanga nikum thleng khan Mizoramah ASF vangin vawk 4,7351 an thi a, vawk 2,5234 suat an ni a. Vawk neitu mi 2488 te hnenah sorkarin zangnadawmna a pe a ni.

<><><>

BJP MIZORAM

BJP Mizoram chuan member lakluh beihpui an thlak turah nimin khan an State Office, Upper Republic-ah Membership Drive Campaign Workshop an nei a, MP hlui Dr. Rajdeep Roy leh leh MLC Bihar, Devesh Kumar-a ten he hun hi an hmanpui.

He hun kaihruiitu State President Pu Vanlalhmuaka chuan thu sawiin, tunhnai maiah Union Minister thenkhatte hnenah Mizoram hmasawmna tur, Mizoram mamawh an hriatte an thlen leh a, an indawr dan leh BJP ni lo Sorkar Official-te indawr dan chu a dang hle a ni, a ti a. Mizoram mipuiin thuneihna an pek loh avang leh State Sorkar nen an thawhho loh avangin hma lak thui erawh har a, nimahsela mipui mamawh hmasawmna thlen turin BJP Mizoram chuan hma a la zel ang, a ti.

Membership Drive Campaign Workshop hi State Level-a neih a nih angin kawngchhiat vanga District thenkhat kal thei lo an awm tih loh ah chuan Member kal tur a ruat te an kal a ni.

<><><>

AZADI SANGEET SAMELAN

Nimin khan New Delhi-a Akasvani hmun Rang Bhawan-a Azadi Sangeet Sammelan buatsaihah sarod player lar Ustad Amjad Ali Khan chu a zai a, he hunah hian Union Minister hlui Smriti Irani leh Akashvani Director General, Maushumi Chakravarty te bakah midangte an tel a. He hunah hian Akashvani chuan Ustad Amjad Ali Khan leh a chhungte chawimawina a hlan a ni. Ustad Amjad Ali Khan hi Padma Vibhushan, UNESCO Award leh ram chung leh ram pawn chawimawina dang tam tak dawngtu a ni.

<><><>

PM

Nimin khan Prime Minister Narendra Modi leh Central sorkar hnathawkte tana Joint Consultative Machinery-a staff side palai te chu New Delhi-ah an inkawm a. Secretary (Staff Side) National Council of Joint Consultative Machinery, Shiv Gopal Mishra chuan hnathawk nuai 32 aiawh

palaita nena an inbiak avangin Prime Minister hnenah lawmthu a sawi. Unified Pension Scheme chungchanga sorkar thutlukna chu fakawm a tih thu a sawi baw.

<><><>

PM MODI

Prime Minister Narendra Modi chuan sorkar hnathawkte chu ram hmasawna kawnga an thawh that avangin a fak. Cabinet-in Unified Pension Scheme chungchanga thutlukna a siam hnuah Prime Minister chuan social media post-ah he Scheme hian sorkar hnathawkte zahawmna leh sum leh pai lama hmasawna a thlen a ni, a ti.

BioE3 (Biotechnology for Economy, Environment and Employment) Policy pawm a nih chungchangah Pu Modi chuan he thutlukna hi High-Performance Bio-manufacturing chawisangtu tur langsar tak a nih thu a sawi a, Hun lo la awm turah pawh scientific, industry leh societal lama hmasawna tur a ni dawn tih a sawi baw. Pu Modi chuan BioE3 chu boruak venhimna leh eizawna siamna atan pawh a thil pawimawh tak ani dawn tih a sawi.

<><><>